

CUSSEGL GROND

Sessiun da favrer 2023

Dumonda Metzger concernent la furniziun d'electricitad da las Ovras electricas d'Engiadina SA a la Grischelectra SA

Il chantun e las vischnancas concessiunaras han cedì a la Grischelectra SA (GESA) lur dretg da 18 pertschient d'energia ord la participaziun a las Ovras electricas d'Engiadina SA (OEE). Las OEE produceschan lur electricitad dapi 5 onns per sut 5 raps per ura kilowatt, l'onn 2020/21 schizunt per 3.83 raps. Tenor rapports en las medias ha il president dal cussegl d'administraziun da las OEE Martin Schmid confermà, che las OEE hajan acquistà per l'onn 2023 electricitad sin il martgà per in pretsch da 55 raps per ura kilowatt. Cumpareglià cun l'onn 2021 vegnan ils custs annuals da las OEE per il 2023 probablamain pli che dublegiads. Quai na tutga betg mo las consumentas ed ils consumers en las vischnancas concessiunaras da las OEE (Valsot, Scuol, Zernez e S-chanf), mabain er la GESA che sto surpigliar l'energia ord la participaziun per il pretsch dubel. Chantun e vischnancas apportan per onn passa 200 uras gigawatt electricitad da las OEE en la GESA. Quai correspunda a stgars 40 pertschient da l'entira energia da la GESA. In pretsch dubel vegn perquai ad avair influenza sin l'import supplementar che sto vegnir prestà tenor il contract da partenadi ed uschia sin las finanzas chantunalas, gea schizunt sin la Repower SA che surpiglia l'energia inclusiv l'import supplementar da la GESA.

Sut quest aspect vulan las sutsegnadras ed ils sutsegnaders savair da la Regenza:

1. È la Regenza pronta da sclerir, tge che ha motivà las OEE SA da comprar electricitad per 55 raps/kWh, malgrà ch'ella producescha sezza electricitad sut 5 raps/kWh?
2. È la Regenza pronta da sclerir, sch'il pretsch da 55 raps/kWh che las OEE SA han pajà è effectivamain vegnì scrit ora sin il martgà public e co che quest pretsch è vegnì fixà?
3. È la Regenza er da l'avis ch'il pretsch da cumpra da 55 raps/kWh è ina consequenza unica da la guerra e ch'in augment respectiv dals pretschs per l'energia da la GESA – pervia da tals acquisti d'electricitad supplementars – cuntrafa perquai al princip da la buna fai?
4. La furnaziun dals pretschs sin il martgà d'energia public da l'Europa vegn fixada tras l'uschenumnà princip da «merit order». Quest princip procura che l'ovra electrica la pli chara fixescha er il pretsch per purschiders precedents. Dapi il cumenzament da la guerra è quai stà – per motivs enconuschents – per il solit il pretsch da gas europeic. Bliers pajais da la UE han perquai limità il pretsch da gas. Vesa la Regenza ina pussaivladad d'intervegnir, per che quest princip da «merit order» na possia betg pli influenzar ils pretschs d'electricitad grischuns en il futur?
5. È la Regenza pronta da communitgar a las OEE ed a lur societads partenarias ch'il chantun na tolerechia betg in tal proceder, ch'el pretendia ina correctura dal pretsch da producziun 2023 da las OEE sin in'autezza senza acquist d'electricitad memia chara e ch'el haja la finamira da far ina cunvegna a lunga vista che impossibilitescha talas influenzas sin il pretsch d'electricitad?

Cuira, ils 15 da favrer 2023

Metzger, Städler, Adank, Biert, Brandenburger, Candrian, Cortesi, Della Cà, Grass, Heim, Hug, Krättli, Morf, Rauch, Roffler, Salis, Sgier, Weber